

四庫全書

史部

欽定四庫全書

史部

幸魯盛典卷十九
七至

詳校官宗人府府丞臣寶光鼐

編修臣程嘉謨覆勳

總校官進士臣繆珙

校對官助教臣胡子襄

謄錄舉人臣李椿

欽定四庫全書

幸魯盛典卷十七

衍聖公孔毓圻率五經博士孔毓埏等恭迎

皇子於德州叩請

聖安請

皇太后安

皇太子安及請

皇子安畢

皇子賜坐賜茶毓圻等叩謝訖即馳歸候於曲阜十

一月初三日壬寅

皇子至兗州府衍聖公孔毓圻率五經博士孔毓埏
等族屬各員五氏子孫迎於境本日

皇子抵曲阜縣城南安營先遣官分守曲阜縣城門
不許隨從人員入城騷擾毓圻等赴

皇子行營恭於

皇上欽頒祝文香帛前行三跪九叩頭禮畢又於

皇子前行二跪六叩頭禮

皇子賜衍聖公孔毓圻及五經博士孔毓埏太常寺
博士孔毓琮國子監博士孔尚任等飲茶畢毓
圻啓進家藏書畫家刻書籍及土產牲隹果蔬
奉

皇子諭止收闕里誌書三部著草三束初四日癸卯
皇子在行營齋戒禮部太常寺官奉請

欽頒祝文香帛虔供於奎文閣上初五日甲辰

皇子在行營齋戒傳衍聖公孔毓圻博士孔毓琹孔毓琿孔尚任等至行營

賜茶是日衍聖公孔毓圻率族屬各官會同禮部太常寺官飭禮器演樂舞視濯具省牲牢拂拭陳設咸遵舊典又設

皇子拜位於露臺之中又設

皇三子獻帛爵位於

神座前以候行禮初六日乙巳辰時

皇子皆蟒袍補服詣

聖廟行告祭禮至櫺星門下馬禮部侍郎席爾達內
務府郎中阜保引導入過奎文閣由大成門東
偏門入至大成殿前贊引官贊盥手

皇子俱盥手畢贊引官引至階上行禮處站立典儀
官唱樂舞生就位執事者各司其事唱畢贊引
官贊就位

皇三子及

皇四子

皇八子各就位站立典儀官唱迎神唱樂官唱迎神
樂奏咸平之曲唱畢奏樂樂畢贊引官贊跪叩
興

皇子俱行三跪九叩頭禮陪祀各官俱行三跪九叩
頭禮立典儀官唱奠帛爵行初獻禮唱畢捧香
帛爵各官俱恭捧就前向

神位站立唱樂官唱初獻樂奏寧平之曲唱畢奏樂

贊引官贊陞壇引

皇三子從東旁門入將至香案前司香官在香案左

邊跪贊引官贊跪

皇三子跪贊上香

皇三子接香盒往上拱舉仍遞與司香官

皇三子復立將柱香拱舉插爐內又將塊香三次拱

舉上畢捧帛跪贊引官贊跪

皇三子跪行一叩頭禮站立贊引官贊獻帛

皇三子將帛捧舉立獻贊引官引

皇三子至獻爵桌邊捧爵官跪贊引官贊獻爵

皇三子接爵拱舉立獻於案中間畢行一跪一叩頭

禮贊引官贊詣讀祝位引

皇三子詣讀祝位讀祝官至祝文桌前行一跪三叩

頭禮畢將祝文捧起就前站立樂止贊引官贊

跪

皇三子跪讀祝官陪祀各官俱跪贊引官贊讀祝讀

祝官讀

御製祝文

文載第一卷

讀祝畢捧舉祝文至獻帛案前

跪安盛帛匣內行一跪三叩頭禮退奏樂聽贊

引官贊時

皇三子行三叩頭禮陪祀各官俱行三叩頭禮畢站

立贊引官贊復位引

皇三子復位站立樂畢典儀官唱行亞獻禮唱畢捧

爵官捧爵就前向

神位站立唱樂官唱亞獻樂奏安平之曲唱畢奏樂
贊引官贊陞壇引

皇三子從東旁門入將至爵案前捧爵官跪贊引官
贊跪

皇三子行一跪一叩頭禮贊引官贊獻爵

皇三子接舉立獻於左邊畢行一跪一叩頭禮贊引
官贊復位引

皇三子復位站立樂畢典儀官唱行終獻禮捧爵就

前過

神位向上站立唱樂官唱終獻樂奏景平之曲唱畢

奏樂贊引官引

皇三子從東邊門入過

神位至右邊將至爵案前捧爵官跪贊引官贊跪

皇三子行一跪一叩頭禮贊引官贊獻爵

皇三子接爵舉立獻於右邊畢行一跪一叩頭禮贊

引官贊復位引

皇三子後位站立樂畢典儀官唱徹饌唱樂官唱徹
饌樂奏咸平之曲唱畢奏樂樂畢典儀官唱送
神樂奏咸平之曲唱畢奏樂贊引官贊跪叩興
皇三子行三跪九叩頭禮陪祀各官俱行三跪九叩
頭禮禮畢立樂畢典儀官唱捧祝帛饌官恭詣
燎位唱畢捧祝帛香饌各官就前捧祝帛官行
一跪三叩頭禮捧香饌官跪不叩起香饌各依
序恭捧由中門出

皇三子退就西邊站立祝帛饌香過畢復位站立焚
祝帛時贊引官贊禮畢

皇子皆退出是日贊引官則贊禮郎法山吳達禪捧
爵帛官兼司拜褥則贊禮郎傳爾特太常寺博
士傳和禮張韜禮生司鐸壘樂舞生奏樂用本
廟樂器樂章并冠服陪祭

皇四子

皇八子拜於堦上公福善額駙尚之隆副都統吳達

禪

御前納爾泰

御前侍衛三十餘員禮部侍郎席爾達兵部侍郎朱都

納內務府郎中阜保工部郎中阿爾輝戶部員

外郎登德禮部員外郎晉布等及山東巡撫桑

格東兗道涂銓提學道朱雯運使李興祖兗州

府知府祖允圖衍聖公孔毓圻五經博士孔毓

埏太常寺博士孔毓琮國子監博士孔尚任等

率五氏有頂帶官生皆拜於殿門之外祭畢

皇子就東齋房更衣復入

聖廟閱視工程內務府郎中阜保前導至大成殿
至聖神座前

皇子俱行三跪九叩頭禮畢前後閱視良久乃出本

日詣

孔林傳

諭曰

先師墓道不宜馳騁從官俱於林門外下馬

皇子至洙水橋下馬步行詣

先師墓前行三跪九叩頭禮禮部侍郎席爾達捧爵

皇子三酌酒行三叩頭禮諸大臣及衍聖公孔毓圻

等陪位行禮禮畢衍聖公孔毓圻啓曰伏覩前

代修葺廟庭經費多出諸有司制度或仍其故

舊未有

特發帑金十萬丹雘煥然聿新如今日者也前代告成

釋奠不過遣大臣行禮而已從未有

皇子親行百僚陪位禮明樂備萬姓聳觀如今日者

也伏惟

皇子行路風霜鞍馬勞頓願攀留一日少憩而行

皇子諭云未奉

父皇旨意不敢稽留遂行即日

皇子至寧陽南驛下營衍聖公孔毓圻率五經博士

孔毓埏太常寺博士孔毓琮國子監博士孔尚

任等送至南驛

皇子賜坐賜茶

諭云初八日仲冬上丁

聖廟祀事重大爾等速回祭

廟不必遠送孔毓圻等叩謝馳歸初八日祭畢衍聖

公孔毓圻親赴

闕廷具疏謝

恩

孔子六十七代孫太子少師襲封衍聖公 臣孔

毓圻謹

奏為恭謝

天恩事康熙三十二年十月蒙

皇上以闕里

聖廟新成

特遣

皇子祭告恭賚

御頒祝文香帛于十一月初三日至闕里臣恭率五氏
官員及諸生人等迎于境上齋戒三日於初六
日辰時致祭于

聖廟臣率五經博士臣孔毓挺等曲阜縣知縣臣孔
興認等咸列陪位禮成謹望

闕叩頭謝

恩訖臣欽惟我

皇上

神靈天亶

智勇性成

日御講筵契詩書易禮春秋之奧

躬親庶政接堯舜禹湯文武之傳

德施遍于寰區既風移而俗易聲教訖于四海更近

悅而遠來

詔裁五色雲中垂萬年之金石

制定九重天上煥數仞之宮牆慶溢臣民歡騰裔嗣乃

聖心益隆俎豆而

寵光遂賁几筵當茲廟貌之維新爰舉

盛朝之曠典

特遣

皇子祭告

絲綸煥發于彤庭香帛遠頒乎闕里

皇子肅膺祀事裸獻加虔升降從容欣覩素嫺之大

禮始終恭恪共欽精白之淵衷維時風清雲朗

日麗星輝于金聲玉振之餘獲人豫神歡之慶
凡夫幽明交感莫非誠敬所孚快茲贊幣之追
隨愜彼園橋之觀望臣竊惟歷代修廟工成祭
告或遣禮官或遣大臣從未有崇儒重道

皇子代祭如

今日者也仰惟

遣告之隆儀實屬振古之異數臣遭逢盛事歡躍難名

感戴

天恩涓埃莫報伏願

金甌永固頌昇平于億萬年

玉燭常調卜昌熾以千百世為此具本跪捧親賡詣

闕恭

謝謹具奏

聞康熙三十二年十一月初六日題十二月初五日奉
旨覽卿奏謝知道了該部知道

臣按古者有釁廟之禮謂作廟初成則升屋封

牲以饗之所謂血祭也不行久矣左傳下管新
宮注新宮逸詩篇名謂文王初作豐而考之或
曰宮室既成而飲酒以落之謂之考然春秋書
考仲子之宮是廟亦有考蓋室成而落焉與廟
成而祭焉皆可謂之考故唐顧況補新宮詩亦
以為新廟成而考之然則廟成告祭其來也尚
矣所以安神靈而昭誠信也至於

聖廟告成必行釋奠然行事者不過主鬯之孫分符

之吏明孝宗以建修

孔子廟成特遣大學士李東陽行祭告之禮即已當時侈為盛事後世傳為美談矣我

皇上特發帑金鼎新修建旅楹松栢皆被

寵光恩至渥矣當大工既成循例籲

恩部臣請照

文廟

傳心殿之例開列大臣恭候

欽點而

皇上乃

特命

皇子親行祭告

御製祝文

內頒香帛備極隆重及祭之日執事有恪禮度克嫻

對越之間恍聞肸蠁振古未見躬自

聖朝園橋觀聽者不啻數萬人咸仰

皇上尊師之至

皇子將

命之恭益使

聖廟增光儒風振起唐哉皇哉非

大聖人其孰能行之至若

皇子經臨先期

傳諭自備日用不擾民間亦皆仰體

皇上愛民至意使燕齊千餘里之民不知有供億之煩

費而但頌典禮之裔皇且自慶其幸生
堯舜之世焉

幸魯盛典卷十七

欽定四庫全書

幸魯盛典卷十八

康熙三十八年己卯正月二十八日

上命內閣大學士伊桑阿阿蘭泰領出

御製

御書重修闕里

聖王廟碑文口傳

上諭

聖廟告竣立碑事關大典仍著阜保帶鑿字人員前往曲阜鐫碑阜保叩領即奏曰

皇上現今親閱河工令臣管理夫役臣願先扈聖駕閱河俟

回鑾之日再往曲阜

上許之

先是重修

聖廟告成衍聖公臣孔毓圻疏請

御製碑文得奉

俞旨毓圻即親赴東山採取碑材斲龍成碑構亭覆之
以待

頒發刊刻

二月

上南巡至德州衍聖公孔毓圻五經博士孔毓埏叩迎

恭請

聖安

是月二十三日纂修官原任庶吉士

臣孫致彌

於濟寧州叩迎

聖駕蒙

恩召對

皇上垂問修書之事致彌奏曰書稿已完因蒙

皇上重修

聖廟

恩旨許賜碑文未奉

頒發此書中未載此一篇

御製大文章所以未敢進呈

御覽奉

旨碑文已有回宮即發致彌叩謝而退

五月

皇上回鑾衍聖公孔毓圻五經博士孔毓埏迎

駕卽扈送而北

皇上過先賢仲子廟

賜匾曰聖門之哲至東昌

賜衍聖公孔毓圻匾曰詩書禮樂五經博士孔毓埏匾

曰遠秀毓圻等叩領歸具疏謝

孔子六十七代孫太子少師襲封衍聖公

臣孔

毓圻謹

奏為恭謝

天恩事

臣

濫膺世職恪守家法自愧庸陋無補

聖朝荷蒙

皇上殊恩下逮渥寵疊頒天高地厚莫能仰報乃者邊隅永靖四海隆平

皇上復念黃淮巨浸未遂安瀾東南輿壤宜宣德惠特舉時巡之典相視河淮巡行江浙

翠華所臨大小臣工億萬黎庶咸遂就日瞻雲之願
臣於五月初七日恭迎

聖駕祇候東昌府境蒙

賜御書詩書禮樂四字

金方氏 卷十八
龍蟠鳳翥煥如日星

光照淵源榮及宗世

臣

弟世襲五經博士

臣

孔毓埏亦

蒙

欽賜遠秀二字凌雲垂露超聖入神

臣

等何人叨此

異數謹率

臣

弟肅捧歸家擬鐫匾額以昭

曠賚隨於路次望

闕叩頭謝恩訖領到

原賜字幅什襲敬藏以示子子孫孫永為珍寶理合

繕疏奏謝奉

旨覽卿奏謝知道了該部知道

十七日

皇上回宮旋

命內務府廣儲司郎中兼參領佐領阜保工部都水司

郎中紀賽及內務府筆帖式王世遵工部筆帖

式岳色鐫碑人梅裕鳳等往曲阜刊刻是日設

御仗黃蓋鼓吹賞送

御製

御書重修

聖廟碑文赴闕里勒碑又奉

旨許阜保紀賽列名於碑陰以六月二十八日至曲阜
衍聖公孔毓圻率族屬纂修各官迎入

聖廟即日鈎勒起工八月

御碑成郎中阜保搨樣本進呈

御覽并恭繳

御筆十月

上命郎中阜保賚裝成

御書

聖廟碑文墨蹟一軸

特賜衍聖公孔毓圻

御碑以八月二十四日告成郎中阜保遵

旨先揭樣本進呈并繳

御書時衍聖公臣孔毓圻口奏

皇上御筆乃萬世之寶前者

御碑真蹟蒙

聖恩特賜與

臣

寵榮無極今次

御筆亦求

皇上特賜永為子孫世守卑保為之轉奏

上命以墨本交南書房校對以真蹟付養心殿裝潢用

寶

賜與毓圻又

賜梅裕鳳為序班列名碑陰十月十八日至曲阜衍聖公孔毓圻率族屬纂修各官郎中紀霽等及序班梅裕鳳皆叩迎謝

恩毓圻即具疏奏謝

孔子六十七代孫太子少師襲封衍聖公臣孔毓圻

奏為恭謝

天恩事竊惟闕里

聖廟仰荷

聖恩重建復蒙

御製碑文

親灑宸翰

命內務府郎中兼佐領參領臣阜保工部郎中臣紀賽

等齋捧前來監視鐫刻於康熙三十八年八月

二十四日告竣摹搨進呈恭繳

御書復蒙

皇上特用寶璽裝潢

命內務府郎中兼佐領參領臣 阜保於十月十八日

頒賜到臣 謹率臣 弟世襲翰林院五經博士臣 孔毓

埏竝闔族官員人等郊外跪接到家恭設香案

竝闔家老幼望

闕叩頭謝

恩訖臣 欽惟我

皇上德懋義軒

治隆堯舜

作君宏作師之統化浹臣民

後聖合先聖之符心傳精一

念尊師而重道必隆禮而竭誠

親駐六飛

躬行九拜春生林廟澤被宮牆

御書遙映乎奎婁

華蓋增輝乎俎豆凡茲大典之勅舉皆屬前代所未

聞

特發帑金重新

聖廟

簡近臣以董役夙夜惟勤凜

天語以鳩工經營盡善當

乘輿之臨幸已銘

聖製于宮碑及新廟之落成更播

天章於貞石闡聖賢之精義皆成帝典王謨發天地之

大文不異星紉雲爛遵道遵路胥瞻

皇極之光希聖希天共仰

宸修之粹

千言書就於頃刻掣電飛雲八法變通乎神明超今
邁古更遴良工摹勒備傳

御筆精神洵為萬世鉅觀彌彰

九重曠典爰相度于大成門外仍位置於

幸廟碑西若日月之竝明榮光交映與乾坤而永奠

聖澤常新誠廟庭初見之殊恩而典冊莫傳之盛事也

何期恭繳

御書乃更仰叨

天眷特頒真蹟

寵錫微

臣

鈐以金泥彩煥螭蟠之璽裝來玉躐珍逾馬

負之圖琅軸精瑩如獻河宗瑞寶錦標璀璨疑
分織女杼機卷舒而色映雲霞瞻仰而光搖金
碧殫人工之巧藝成天府之奇珍誠乃振古莫

傳豈特當今罕覲恍如虹玉重臨闕黨之堂直
比麟書更吐昌平之里光榮已極抃舞難勝此
皆仰荷我

皇上褒崇先聖垂有加無已之恩因而施及微臣膺過
分逾涯之寵臣敢不勉思祖德虔戴

君恩奉為宗祏珍藏重於車服永勗子孫世守寶過璫
璵仰惟高厚難名自愧涓埃莫報唯頌太平之
有象祝

聖壽之無疆而已奉

旨覽卿奏謝知道了該部知道

十一月十五日山東巡撫王國昌布政使劉暄
署按察使事青州道張聖猷東兗道傅作楫兗
州府知府李世敬通判許嗣華等恭詣闕里瞻
仰

御碑兼拜觀

御筆二十四日郎中早保等賫奉

御碑搨本進京復

命

初郎中阜保奉

旨將

御碑搨二十本時方嚴冬或以冰凍皸瘃為虞乃自十

月十九日始皆和風晴旭盎然春和搨紙上墨

並得其宜每成一幅古香異采晃朗心目從來

玉枕銀鋌號為珍奇者莫能望其萬一也至十

一月十八日始竣是夕即微霰零而堅冰至矣
聖德感召先天而天弗違如此豈非

聖神功化之極哉阜保等乃什襲棄藏載以歸

獻於是衍聖公臣孔毓圻等巡撫臣王國昌等咸口

奏曰

皇上此碑乃亘古未有之異寶伏求

皇上特恩准臣等自備工料各搨一本奉以珍藏傳之

世世子孫永戴

天恩於罔極不勝激切屏營之至又纂修官候補內閣

中書

臣

叢克敬原任庶吉士

臣

孫致彌各恭進

頌

聖詩文冊頁俱交阜保代奏十二月初五日阜保到京

奏

聞訖

臣

按

先聖廟庭碑版林立然罕有出自九重者宋真宗一

贊未聞親書明代三碑雖云御製但多出詞臣
代言至於揮毫則委諸中書而已我

皇上心符

前聖天縱多能甲子冬

臨幸闕里

賜匾

賜詩皆杼軸于

聖衷揮灑於

御筆已為古今曠典又

賜以廟碑皆

御製

御書更令奎壁增輝宮牆生色矣至於

聖廟鼎新紀厥成績衍聖公臣孔毓圻仰荷

天寵復丐

殊恩拜疏之餘實深悚息乃蒙我

皇上俯賜寬容曲垂優渥

重煥經天緯地之文

更運羲畫禹碑之筆

制作則典墳讓古

結構與造化爭奇猶窺天者時序改而日月長新如

觀海然挹取多而淵源彌永殷殷乎重道尊師

之旨拳拳乎化民成俗之源大哉

王言洵足以超姚姒而軼羲軒矣臣民相慶咸以得瞻

拜

天章而涵泳

聖澤懽懽踴躍不自知其手之舞之足之蹈之也至矣

盛矣蔑以加矣

幸魯盛典卷十八

欽定四庫全書

幸魯盛典卷十九

康熙二十五年丙寅四月

命以宋儒周惇頤後為世襲五經博士

左僉都御史姚締虞

題為

聖心重道方殷先賢表彰未盡亟請

勅議褒恤以昭

盛治之曠典事

臣惟我

皇上德盛化神治隆道備崇重

先師之典禮錄恤周公之子孫

恩綸屢沛炳若日星猗歟盛哉真千載一時矣乃有以
一人而當理學絕續之關躬繼往開來之任上
接孔孟下啓程朱厥功甚鉅而表揚未及若不
及今陳請徒令世遠人湮臣請得為

皇上陳之臣按道學之傳孔孟而後荀楊之徒不精不

詳洎乎五季昏昧已極宋儒道州周惇頤出直
接孟氏之傳太極圖說闡河洛之精微易理通
書闢天人之秘蘊潛修默契閭極而章洛人程
珦遣二子顥頤受學焉皆能唱鳴道學以大發
有宋一代之盛故朱熹之序惇頤曰世所謂二
程先生者其原蓋自先生發之也可謂不忘所
自矣臣又按宋嘉定十三年謚惇頤為元公其
辭曰先生博學力行會道有元脈絡貫通上接

乎洙泗條理精密下逮乎河洛以元錫名庶幾
百世之下知孟氏之後明聖者必自濂溪始淳
祐元年追封汝南伯元延祐六年加封道國公
明正統元年葺理惇頤祠墓優免子孫差役景
泰六年查道州周惇頤嫡長子孫一人周冕授
翰林院五經博士世襲撥給墓田至明季而遂
失其傳矣竊念先有惇頤然後有程朱今二氏
世襲勿替而惇頤子孫淪落祠地荒地揆之典

章不無掛漏幸逢我

皇上崇儒重道理學修明臣請

勅廷臣集議詳考惇頤當理學絕續之際啓程朱道脈
之傳即行楚撫查其子孫果否曾世授五經博
士

特賜洪恩酌加恤錄不惟慰先儒於地下亦可以勵百
世之人心矣奉

旨九卿詹事科道會議具奏

禮部等衙門

題前事

臣

等議得查順治十二年禮部

題明將朱文公十五代嫡孫朱邦相之子煌承襲博

士又查康熙九年據河撫郎廷相

題請禮部

題覆將程顥程頤之後裔程宗昌程延祀准襲五經
博士各在案周惇頤上接孔孟下啓程朱其後
裔亦應照程朱之例准給博士之職以彰

皇上闡明理學之盛典俟

命下之日行文該撫詳查周惇頤嫡派并取各結及周氏之宗譜一併移送到日由禮部查明將應授之人具

題准授世襲五經博士可也奉

旨依議

附錄 周惇頤字茂叔號濂溪道州人輔成之
子累官至廣東轉運判官提點刑獄以洗冤澤

物為已務尋因疾求知南康軍為學不由師傳
默契道體所著有通書太極圖說嘉定十三年
賜謚曰元公淳祐元年封汝南伯從祀孔子廟
庭

臣按宋儒黃幹曰道之正統待人而後傳自周
以來任傳道之責者不過數人而能使斯道之
較著者二人止耳由孔子而後曾子子思繼
其微至孟子而始著由孟子而後周程張子繼

其絕至朱子而始著則濂溪處絕續之交能肩
荷斯道開闢肇端以待來者誠理學之功臣宋
儒之領袖也我

皇上聰明時憲道積於躬

秉一中而允執

集千聖之大成亦既參天兩地窮神知化矣在昔

先師鈎河摘洛以啓苞符之秘而惇頤太極通書闡

揚突奧復乃曲暢旁通

皇上萬幾之暇緝熙亶心統貫於三古四聖之微言而博採於有宋諸儒之緒論伏見往者嘗

親書太極圖說以賜廷臣蓋惇頤之書久矣有當於

聖心夫是以加恩後人而錫之世爵也越一年而張載之後亦授官自是濂洛關閩之子孫皆食其舊德而其源流倫叙釐然秩然矣

康熙二十六年丁卯五月

命以宋儒張載後為世襲五經博士

戶科給事中汪晉徵

題為

聖心重道日隆先賢表彰有待仰祈

勅議褒錄以全一代之鴻規以重百世之大典事切臣
於本月二十二日隨九卿齊集內閣仰瞻我

皇上御撰

至聖先師孔子廟碑

親灑宸翰臣口誦心維其文則日星雲漢其詞則訓誥

典謨其書則銀鈎鐵畫玉粹珠圓洵足籠罩古今
蘊含造化以孔子而得此至文實聖道之大
幸臣等生際唐虞之世得覩光華復旦之章尤
臣等之大幸也總由我

皇上天縱聖明於堯舜孔孟之傳實有心得故尊崇之
典有加無已切思自孔孟以後道學之緒至宋
周程張朱而始著此四姓五人者名號並懸於
天壤之間學問皆徹乎性天之始以故祀典均

昭藝林咸頌乃程朱二氏固已久置世龍襄博士
即周惇頤復蒙我

皇上允憲臣姚締虞之請錄其子孫亦為博士是四姓
五人同功一體而四人者俱承雨露世襲勿替
獨張載一人子孫淪落褒恤未加按張載係陝
西鳳翔府郿縣人學者稱為橫渠先生其所著
正蒙西銘諸書闡往聖之精微為後學之津筏
程顥曰西銘之言極純無雜秦漢以來學者所

未到其推重如此且見我

皇上頒賜先賢書院學達性天匾額周程張朱邵五人
均屬一例則知

聖心藻鑑原無二視伏乞

勅廷臣集議即行秦撫查其子孫

特賜洪恩使得與周程朱三氏一體恤錄則萬年理學
之所尊崇即萬世人心之所振起矣奉

旨九卿詹事科道會議具奏

禮部等衙門

題前事該臣等會議得戶科掌印給事中汪晉徵疏
稱

皇上天縱聖明於堯舜孔孟之傳實有心得故尊崇之
典有加無已自孔子孟以後道學之統至宋周程
張朱而始著此五人者名號並懸於天壤之間
學問皆接乎性天之始以故祀典均昭乃程朱
二氏固已久置世襲博士其周惇頤子孫亦為

博士獨張載一人子孫淪落褒恤未加其所著
正蒙西銘闡往聖之精微為後學之津筏

皇上頒賜先賢書院學達性天匾額周程朱張邵五人
均屬一例其子孫與周程朱三氏一體恤錄等
語查順治十一年八月內據江南布政使司呈
請朱熹子孫朱煌承襲博士等因禮部具題授
為世襲五經博士康熙九年五月內禮部題覆
臺臣條奏程顥程頤子孫程宗昌程延祀授為

世襲五經博士康熙二十四年四月內九卿詹
事科道會議都察院左僉都御史姚締虞條奏
周惇頤後周嘉耀擢為世襲五經博士俱在案
張載關中大儒與濂洛並重相應將張載子孫
亦照周程例授為博士俟

命下之日行文該撫詳查張載嫡派并取各結及張氏
宗譜移覆到日由禮部查明應授之人具

題准給世襲五經博士可也奉

旨依議

附錄 張載字子厚長安人舉進士為祁州司
法歷渭州僉判召為崇文殿校書同知太常禮
院為人志氣不羣初喜談兵及釋老書反而求
之六經既見二程子盡棄異學而學焉神宗立
詔問治道以漸復三代為對與執政不合告歸
危坐一室潛心精思教人以禮闕西之士翕然
宗之所著有東銘西銘正蒙擴聖賢所未發嘉

定十三年賜謚曰明公淳祐初封鄱伯從祀孔子廟庭

臣按宋代理學啓於濂溪盛於二程而橫渠起於關中羽翼而倡和之游酢至稱其學成德盛比諸孟子非阿所好也觀其言曰為天地立心為生民立極為前賢繼絕學為萬世開太平此其任道之勇救民之切與孟子亦何以異耶周程朱氏皆得世職以奉烝嘗而張氏缺焉莫問

幸遇我

皇上崇禮

至聖推及於聖賢先儒而橫渠之後始得與諸儒裔
一體邀千古未舉之典待

聖明而乃備焉此則振起文教之大用匪但儒門生色
而已也

康熙二十九年庚午二月

命宋儒朱熹閩派嫡孫朱滌復襲翰林院五經博士

福建巡撫張仲舉

題為懇賜轉請

題襲以沐

聖恩以昭盛典事該臣竊見宋儒朱熹述聖學之淵源

綜諸儒之精奧傳註同符於刪定正誠昭示於

來茲其有裨於世道人心者甚鉅是以歷來祀

典備極敦崇爰錄後裔俾之蔭襲蓋功既獨隆

報宜世享乃考其裔派熹祖籍係江南徽州府

之婺源自父松厯官閩土遂家於閩熹以理學
振起實在閩中長子塾之後世居閩之建安次
子埜之後于元至元中詔回婺源祖籍故有閩
徽二派之分查閩派熹之九世孫名挺者明景
泰六年詔為五經博士世襲主祀其徽派至熹
十一世孫名墅者明嘉靖二年亦以五經博士
主婺源祖祀此熹裔原有廕襲博士二員而閩
派之錄廕居先七傳至之雋廕襲則明天啓間

事也迨至

本朝定鼎閩派未邀

恩命續有朱濬呈稱係熹十八世嫡孫伊父金鉉早亡
伊祖之雋曾於順治九年具呈建安縣由府轉
送請給文赴部年老病殂維時濬尚幼稚遂致
稽延今籲請襲等情并稱徽郡子孫業蒙廕襲
之語緣司府縣疊加駁覆始為轉詳臣行司確
覆始則據族鄰紳士之僉結再考誌乘記載之

世系復移咨江南查徽派廕襲原委今查福建
通誌四十二卷自槌至之僞于順治九年呈請
給文赴京有府存印冊可據再准江省咨覆徽
派今襲職朱坤呈明閩派之原襲廕可據與誌
載圖結及司詳情節相符是朱濬實為閩派應
襲之人而前此之稽遲似有由也伏惟我

皇上神聖首出重道崇儒通歲以來

駕幸闕里

頤額學宮旁及崇祀書院悉蒙

宸翰表彰而元聖周公暨宋儒周惇頤諸後裔并邀世職之錄此皆前代所未行而

皇上行之右文之盛超軼百王真千載一時也

臣思

皇上既行前代所未行臣何敢以已行中缺之典因其稽久泯不上

聞況徽派業蒙蔭襲而閩地紫陽書院亦荷

欽頒匾額是熹裔之有閩派久在

皇上睿鑒之中必不令其主祀子孫獨遺

恩澤之外伏乞

勅查舊典熹裔原有博士之例仰邀

俞允俾朱滌得叨承襲不獨熹之祀典增輝而益昭

聖世崇儒之盛矣除圖結送部外臣謹會同閩浙督臣

興永朝合詞具

題伏乞

勅部議覆施行康熙二十九年正月二十四日奉

旨該部議奏欽此欽遵該臣等議得宋儒朱熹祖籍徽州之婺源以父松官于閩遂居閩之建安熹長子塾之後世居建安守熹之墓次子埜之後還居婺源守熹祖墓故熹之裔有閩徽二派明實錄開載景泰六年以塾之後埜為五經博士主建安祀嘉靖二年照建安例以埜之後埜為五經博士主婺源祀原有博士二員我

朝順治十二年部覆准朱煌龔五經博士于婺源縣奉

祀在案今據福建巡撫張仲舉會同總督興永
朝題稱有建安原襲博士朱之雋于順治九年
曾起文赴部因病旋卒而其子金鉉又經早亡
時其孫濬尚在幼稚致稽請襲至康熙十九年
濬始具呈申請疊經移查駁覆誌乘宗圖悉相
符合朱濬實係閩派應襲之人等語仰惟

皇上崇獎先儒廣勵正學以朱熹有功經傳特于徽閩
二處各賜

御書匾額褒崇之典踰於往代熹十八世嫡孫濬既經
該督撫查明具題應准承襲五經博士以奉建
安祀事恭候

命下臣部轉行吏部察例給劄可也臣等未敢擅便謹
題請

旨康熙二十九年二月初七日題本月十一日奉
旨依議

附錄 朱熹字元晦一字仲晦徽州婺源人少

依父友劉子羽寓建之崇安徙建陽歿即葬焉
登第五十年仕於外僅九考立朝僅四十日官
至煥章閣侍制奉祠謚曰文追封徽國公初父
松病亟屬熹於胡憲劉勉之及子羽熹皆從之
游延平李侗嘗學於羅從素熹罷同安主簿歸
不遠數百里徒步往從之其為學大抵主敬以
立其本窮理以致其知反躬以踐其實而敬又
貫乎三者之間所以成始而成終也嘗謂聖賢

道統之傳散在方策聖經之旨不明而道統之傳始晦於是竭其精力以研窮聖賢之經訓所著有易本義啓蒙著卦考誤詩集傳大學中庸章句或問論語孟子集註太極圖通書西銘解楚辭集註辨證韓文考異所編次有論孟集議孟子指要中庸輯畧孝經小學書通鑑綱目宋名臣言行錄家禮近思錄河南程氏遺書伊洛淵源錄又有儀禮經傳通解未脫藁亦在學宮

平生為文一百卷生徒問答八十卷別錄十卷
淳祐元年理宗視學手詔以張周二程及熹從
祀孔子廟黃幹曰道之正統待人而後傳自周
以來任傳道之責者不過數人而能使斯道章
章較著者一二人而止耳由孔子而後曾子子
思繼其微至孟子而始著由孟子而後周程張
子繼其絕至熹而始著識者以為知言

臣按朱熹集宋代諸儒之大成上繼孔孟不傳

之道統其所撰集皆足以羽翼聖經闡明正學
有大醇而無小疵魏了翁稱其功不在孟子下
信矣自宋理宗時即已追封從祀而遺墓在閩
其長子塾之裔世守焉明景泰時得博士世職
在徽派博士之先承襲至之雋而明祚忽諸迨
八閩道通之雋將請

朝命未行而卒嫡子早世孤孫方乳遂以奉祠生主壘
書院且四十年赴訴大吏莫為陳請幸遇吾

皇上親祭

闕里

頒賜

御書學達性天匾于紫陽書院儒裔朱滌始備陳顛末

撫臣再四查覈據以請

命此皆仰沐

皇上崇儒右文之德化始能觀感奮興舉此曠典而先

儒子孫復得叨

命服之榮以奉其祠墓九曲巖壑增榮益觀直與尼防
鄒嶧同沐

恩光遙相輝映猗歟盛哉

康熙三十九年庚辰五月

命先賢閔子裔閔衍籀端木子裔端木謙俱世襲翰林
院五經博士

先賢閔損六十四世奉祀嫡孫閔煌謹

奏為援例陳情乞

賜襲封以光祀典以廣

皇仁事竊見崇儒固昭於歷代尊聖莫隆於我

朝孔顏曾孟以及先賢仲子先儒朱子後裔久膺世襲

爵秩我

朝復錄先儒程子後裔

聖駕至魯錄元聖周公後裔近又錄先儒周子張子後

裔真所謂不朽之盛事而萬古為昭者也俯念

臣祖閔損緣係魯人為聖門高弟德並顏淵有

以紹千古之心學孝嬪曾子足以扶萬世之名
教且其辭費留介介之節侍側傳聞聞之容載
在魯論班班可考是以稱為大賢從祀聖殿居
十哲之首壇為諸賢之領袖歷代皆有公袞之
褒

聖朝尤重釋奠之典臣忝係嫡裔世居東魯承掌宗譜
歲赴歷城廟墓躬承祭祀奈貧窶難堪孝思莫
展因思聖廟四配以及先賢仲子並先儒後裔

皆受翰博之職長為俎豆之光而臣祖德冠聖
門位首羣賢尚以布衣承祀几筵無色此所為
日望

九重而冀

恩榮之下逮也前二十三年冬

駕幸聖林臣同十哲諸賢後裔跪進表章又於二十八
年春

聖駕南巡臣復為瀆奏皆未得蒙

御覽今幸

天顏再覩千載竒逢臣不揣愚賤匍匐陳情伏惟
聖上德冠古今孝治天下懇乞

天恩軫念先賢功德

特賜世蔭以承俎豆臣敬

君孝祖之忱於焉得盡

皇上崇儒重道之典於茲益彰矣臣草茅下賤不諳

朝儀冒瀆

天顏悚懼待罪伏乞

鑒宥施行為此具本並家譜恭進上奏請

旨

先經禮部

題為乞彰功德

俯賜襲封以光祀典以廣

皇仁事據先賢端木子嫡裔奉祀生員端木謙奏前事

奉

旨交與吏部欽此該臣等議得據先賢端木子嫡裔奉祀生員端木謙奏稱伏見歷代崇儒之盛我朝重道之隆每於先聖先賢後裔

賜予恩禮有加無已臣祖端木賜負資穎異功德特著不惟不等乎孟仲而且不及乎程朱伏乞

特賜爵秩照仲氏子孫程朱後裔一體承襲博士以奉祭祀等語又據先賢端木賜裔孫奉祀生員端木植

奏稱臣祖端木賜字子貢聰明特達不亞曾仲羽翼
道德遠過程朱子孫未沾一命之榮伏乞

皇上俯念先賢功德

勅部照依仲由程朱之例亦

賜恩廕以奉烝嘗以光俎豆等語查康熙十三年五月
內衍聖公孔毓圻

奏請子張子嫡裔顓孫好賢援仲氏例請襲五經博
士一疏臣部議覆內開聖門弟子內歷代俱定

有等第授為博士其奏請顯孫好賢授為博士之處應無庸議等因在案查歷代聖門弟子內閔損冉雍卜商冉耕宰予冉求言偃顯孫師俱與端木賜在十哲之列伊等之後亦未曾授為博士之處此端木謙端木植奏請照仲子裔孫例承襲博士之處應無庸議可也奉

旨依議至是先賢端木賜七十代嫡孫奉祀生員臣端木謙謹

奏為援例陳情乞

賜襲封以崇先賢以廣

皇仁事竊惟道統之傳自孔子而下先賢有四配十哲
以傳其統先儒有周程張朱以闡其緒此誠有
功於天下後世者也歷代莫不尊崇孔顏曾孟
之子孫或封於唐或封於宋或封於元明皆賜
以世爵主奉烝嘗可謂隆矣然數十朝而霑恩
者止有四氏若仲由朱熹之後裔則襲封於我

朝定鼎之初程顥程頤之子孫則承廕於

皇上御極之始且

駕幸闕里於

至聖孔子則祭以太牢

賜以金帛

御書萬世師表以尊之於元聖周公則封其主祀之人
大其棲神之所撥給祀田戶人以崇之繼此而
邀

恩者則又有周惇頤之苗裔張橫渠之後嗣兼有陪祀
恩貢

錫予恩禮有加無已是崇儒重道誠為前代之所未
有而後世之所莫加者也臣係先賢端木賜嫡
孫前

駕幸孔林臣在廬墓堂叩接
聖駕得觀

天顏仰承

顧問復蒙

洪恩准臣奏章誠千古之罕覲人世之奇逢也臣草茅下士當此隆遇雖捐糜頂踵猶不能仰報

高厚千萬一何敢復瀆

天聽但念臣祖在聖門道傳一貫學聞性天承前聖之統緒開後世之心學至于表章聖治有立道綏動數語可謂傳聖人之心法兼得聖人之治法矣在十哲中而諸賢未能或之先也即後世周

卷十九
程張朱或亦莫之及也況三年廬墓實聖門之
孝子說楚兵迎解陳蔡之重圍其於聖人功匪
小矣而後裔未獲邀一命之榮是前既不能比
於四配後復不克同於五儒即十哲之中更不
得並于子路此千百年未舉之曠典正留以待
今日者也恭遇我

皇上修明典禮表章先哲實臣之幸也但

九閭遠於萬里草野難達

楓宸今幸

聖駕南巡見

鑾輿之遙臨遂生平之仰望謹修短表匍匐接

駕伏乞

聖裁俯念先賢之功德照依仲由子孫周程張朱例一

體恤錄雖臣一家之私榮實天下萬世之同慶

道統丕顯

聖德增輝臣愚蒙寒賤不諳

朝儀冒瀆

天顏悚息待罪伏乞

恩宥施行為此具本跪捧以

聞並端木誌譜恭呈

御覽

山東巡撫王咨為前事准禮部咨稱該禮部等
衙門會覆山東巡撫王題前事內開該臣等會
議得先經禮部議覆閔煌端木謙請給博士之

處毋庸議具題奉

旨九卿詹事科道會議具奏欽此該臣等議覆恭遇
皇上崇儒重道之時兩賢後裔似應授與官職以彰曠
典但其後裔歷世久遠是否嫡派亦未可定應
行文該撫會同衍聖公確查嫡派將應授之人
保送到日再議等因具題奉

旨依議欽此欽遵隨行文山東巡撫衍聖公去後隨據
該撫咨稱閔煌端木謙寄籍濟寧各止五世況

直隸江南河南皆有宗派東省不便遽為保送
前來禮部復行文該撫會同衍聖公確查保送
去後今據該撫疏稱原叩

閣之端木謙實係端木子嫡裔其閔子嫡裔閔煌又稱
伊兄子閔衍籀係長房嫡子閔衍籀應膺廕典
閔煌出具甘結等語既經該撫會同衍聖公確
查將端木謙閔衍籀保題前來相應將端木謙
閔衍籀准授為五經博士世襲俟

命下之日禮部轉咨吏部照例給劄其端木謙閔衍籀
之宗譜併通族甘結印結仍行文該撫會同行
聖公照例送部可也等因康熙三十九年正月
二十四日題本月二十六日奉

旨依議欽此欽遵到部相應行文山東巡撫可也等因
呈堂奉批行送司擬合就行為此合咨前去遵
照

旨內事理欽奉施行等因到部院案行到司蒙此隨行

兗州府轉行查取去後今據該府申據濟寧州
申稱遵即轉行端木謙閔行籀知照外復移濬
縣取到端木謙通族甘結濬縣印結并將取到
閔行籀通族甘結加具卑州印結同二氏宗譜
一併具文申送等情到府據此擬合轉送等情
到司據此該本司布政使劉暄查得奉院案准
禮部咨開端木謙閔行籀准授為五經博士世
襲仍取端木謙閔行籀宗譜並通族印甘各結

會同衍聖公照例送部等因當即檄行兗州府
查取去後今據該府申送端木謙閔衍籀二氏
宗譜并通族印甘各結前來相應呈祈本部院
俯賜會同衍聖公照例咨送禮部可也等情到
部院據此擬合咨送為此會同衍聖公合咨貴
部煩請查照施行

禮部咨同前事祠祭清吏司案呈禮科抄出該
禮部等衙門會覆山東巡撫王國昌題前事內

開該臣等會議得先經禮部議覆閔煌端木謙
請給博士之處毋庸議具題奉

旨九卿詹事科道會議具奏欽此該臣等議覆恭遇

皇上崇儒重道之時兩賢後裔似應授與官職以彰曠
典但其後裔歷世久遠是否嫡派亦未可定應
行文該撫會同衍聖公確查嫡派應授之人保
送到日再議等因具題奉

旨依議欽此欽遵隨行文山東巡撫衍聖公去後隨據

該撫咨稱閔煌端木謙寄籍濟寧各止五世況直隸江南河南皆有宗派東省不便遽為保送前來禮部復行文該撫會同衍聖公確查保送去後今據該疏稱原叩

閔之端木謙實係端木子嫡裔其閔子嫡裔閔煌又稱伊兄子閔衍籀係長房嫡子閔衍籀應膺蔭典閔煌出具甘結等語既經該撫會同衍聖公確查將端木謙閔衍籀保題前來相應將端木謙

閔衍籀准授為五經博士世襲侯

命下之日禮部轉咨吏部照例給劄其端木謙閔衍籀
之宗譜併通族甘結印結仍行文該撫會同行
聖公照例送部可也等因康熙三十九年五月
二十四日題本月二十六日奉

旨依議欽此欽遵到部相應移咨衍聖公遵照
旨內事理欽奉施行

臣按四科之目著於漢儒十哲之稱見於北魏

後世躋顏子于四配而以有若補之其見於孟子之書者或云具體而微或云善言德行或云有聖人之一體或云似聖人或云智足以知聖人皆篤論也顧歷代以來雖膺封爵之榮享堂上之祭而未有錄其後裔者唯仲子之後得襲世職于明末相傳至今而諸賢皆僅以諸生奉祠殊未稱

朝廷尊崇之意今我

皇上因親祀

孔子而廣及先賢子騫子貢乃得與子路一體邀
恩澤及苗裔俎豆增光何其盛也且竊溯

幸魯迄今已十有六年而

皇上推恩

先聖之心久而彌勤若斯豈萬古所能幾及哉

康熙四十一年壬午二月

命以先儒邵雍後裔邵文學為世襲五經博士

掌江南道監察御史杜之昂謹

題為先賢闡明聖學懇祈

一視同仁以溥

皇恩以光史冊事欽惟我

皇上崇儒重道講學右文先聖先賢無不留心表揚曾

有

御書匾額學達性天四字

頒賜周惇頤程顥程頤張載朱熹邵雍六子煌煌

宸翰奎壁生光其榮一也是邵雍內聖外王之學與五

子同功已在

聖明洞鑒之中臣一介迂儒何能翼贊

高深然仰體

聖心崇祀先賢表揚聖學有加無已凡先賢子孫均沐
隆恩如周程張朱俱有博士以主其祀而邵雍獨無博
士以及其後臣因不辭冒昧敢為邵雍博士之

請惟

恩出

聖裁或可與五子

一視同仁

勅部確查邵雍正支嫡派以承祀典邵雍有靈感

恩無既垂之史冊光昭千古矣如果臣言不謬伏乞

勅部議覆施行康熙四十年五月二十八日奉

旨該部議奏

禮部

題為先賢闡明聖學懇祈

一視同仁以溥

皇恩以光史冊事禮科抄出掌江南道事河南道監察

御史杜之昂

題前事奉

旨該部議奏欽此該臣等議得河南道監察御史杜之

昂疏稱欽惟我

皇上崇儒重道講學右文先聖先賢無不留心表揚曾

有

御書匾額學達性天四字

頒賜周惇頤程顥程頤張載朱熹邵雍六子煌煌

宸翰奎壁生光是雍內聖外王之學與五子同功已在
聖明洞鑒之中周程張朱子孫俱有世襲博士以主其
祀而邵雍獨無博士以及其後

恩出

聖裁或可與五子

一視同仁

勅部確查邵雍正支嫡派以承祀典等語查順治十二

年八月內據江南布政使呈送朱熹子孫朱煌

承襲博士臣部題覆授為五經博士康熙二十

九年二月內臣部題覆福建巡撫張仲舉疏請

朱熹子孫朱濬授為世襲五經博士康熙九年

五月內臣部題覆臺臣傳世舟條奏程顥程頤

子孫程宗昌程延祀授為世襲五經博士康熙

二十四年四月內九卿詹事科道會議都察院
左僉都御史姚締虞條奏周敦頤子孫周嘉耀
授為世襲五經博士康熙二十七年九月九卿
詹事科道會議戶科掌印給事中汪晉徵條奏
張載子孫張守先授為世襲五經博士俱各在
案臣等恭惟我

皇上治隆今古

學貫天人以上接堯舜之心傳遠承孔孟之道統凡屬後

裔悉叨

聖世隆恩今御史杜之昂條奏周惇頤程顥程頤張載
朱熹邵雍俱蒙

御賜匾額是邵雍內聖外王之學與五子同功已在
聖明洞鑒之中等語相應如其所請一體授與博士以
彰曠代之

殊恩萬年之盛典但其後裔歷世久遠無憑稽考俟
命下之日行文該撫確查嫡派將應授之人保送到日

再議可也六月十八日奉

旨依議

巡撫河南兵部右侍郎兼都察院右副都御史

臣徐潮

題為先儒闡明聖學等事該臣看得宋儒邵雍闡明
道學有功名教臺臣杜之昂條

奏比例周程張朱世襲承祀部覆行臣將邵雍嫡派
應授之人宗圖宗譜印甘各結具題行據布政

使李成林詳稱查明邵雍嫡派二十八代孫邵
養醇於明崇禎六年授為博士明末寇亂養醇
故後劄付無存養醇之子邵國璋係邵雍二十
九代孫但年逾七旬難習禮儀今國璋之子邵
文學係應授之人取具圖譜各結前來請

旨施行奉

旨該部知道

禮部

題為先賢闡明聖學懇祈

一視同仁以溥

皇仁以光史冊事禮科抄出河撫徐潮

題前事奉

旨該部知道欽此該臣等議得先經臣部題覆御史杜之昂為先賢邵雍之後請襲博士一疏令行該撫確查嫡派將應授之人保送到日再議等因具

題奉

旨依議欽此隨行文河南巡撫去後今准該撫徐潮疏
稱查明崇禎六年邵雍嫡派二十八代孫邵養
醇曾授為博士明末寇亂劄付無存邵養醇之
子邵國璋係邵雍二十九代長門嫡孫但年逾
七旬難習禮儀今邵國璋之子邵文學乃邵雍
三十代長門嫡孫係應授之人取具宗圖譜印
甘各結保

題前來相應將邵文學准授為世襲五經博士俟

命下之日臣部轉咨吏部照例給劄可也康熙四十

年二月初五日奉

旨依議

附錄 邵雍字堯夫其先范陽人父古徙衡漳

又徙共城雍年三十遊河南葬其親於伊水上

遂為河南人事北海李之才受河圖洛書伏羲

八卦六十四卦圖象探賸索隱妙悟神契衍先

天之旨著書十餘萬言事親盡孝歲時耕稼僅
給飲食名其居為安樂窩司馬光兄事之嘉祐
中詔求遺逸王拱辰以雍應詔授將作主簿復
補潁州團練推官皆固辭卒年六十七贈秘書
省著作郎元祐中賜諡康節咸淳三年追封汝
南伯從祀孔子廟廡

臣按邵雍居河南時程顥與之議論終日歎曰
堯夫內聖外王之學也程頤銘其墓曰雍之道

純一不雜就其所至可謂安且成矣朱熹贊之
曰天挺人豪英邁蓋世駕風鞭霆歷覽無際手
揮月窟足躡天根間中今古醉裏乾坤其為程
朱推重如此宜我

皇上學達性天之賜以六子並稱詎非千古帝王卓識
歟茲

可臺臣請

允禮臣議


特賜其後裔世襲五經博士與周程張朱之後一體襲
職此真

聖明浩蕩之恩曠古未有之典昔雍精河洛理數遇事
前知嘗與歐陽棐道其立身本末且曰足下其
無忘鄙人於異日雍卒留守韓維請謚於朝
時為博士作謚議恍惚當時之言落筆如其自
序則雍必有以逆知數百年後有

大聖人出德位兼隆榮其後裔吾

皇上道契先天德符至理豈偶然哉從此海內蒸蒸咸
思昌明聖學興起百世之下吾

皇上壽世作人之化洵非百王所能幾及矣



辛魯盛典卷十九